



11. september 2020

UKA 2020/63

Inatsisartut ingerlatsinermut maleruagassaanni § 36 tunngavigalugu matumuuna apeqquteqaat aallaavigalugu oqallisissatut una siunnersuutigaarput:

Apeqquteqaat aallaavigalugu oqallisissatut siunnersuutigineqarpoq, sulineranut tunnganerusumik inuussutissarsiornermut ilinniakkat, ilinniarnep annersaa suliffeqarfinni ingerlanneqarluni, qanoq ililluni amerlanerit ilinniagaqalernissaannut ikiuutaasinnaanersoq.

(Demokraatit Inatsisartuni gruppiat)

Ajoraluartumik imaappoq, inuusuttorpassuaqartoq, ilinniakkamik aallartitsisimangitsunik imaluunniit sulilersimangitsunik. Eqimattami 16-25-inut ukiulinni (2018) pingasuugaangata ataaseq, ilinniagaqaranilu suliffeqarneq ajorpoq¹. Kisitsisit taakku annilaarnarput, tamattalu eqqarsalersittariaqarpaatigut, arlaannik allatut iliortariaqarnitsinnik.

Uagut kalaallit assassullaqqittuuvugut. Uatsinnut ukiuni tusintilinni ilinniarnep oqaatsit atorlugit ingerlatitseqqiinikkut ingerlanneqartarsimavoq uagullu meeqqavut ernuttagullu ilinniartittarsimavagut sakkussaat assaannut tunniullugit.

Ullumikkut ilinniarnep annerpaatigut atuarfimmi pisarpoq. Aamma ilinniakkat assassornermut tunngasut, ilaannullu tamanna ajunngilluinnartumik ingerlasarpoq. Kisiannili tamanuunngitsaq.

Demokraatit upperaasut, inuusuttut amerlanerungaartut suliffeqarlutillu ilinniagaqarsinnaagaluartut, ilinniakkat pisinnaasat piginnaanerillu malillugit aqqissuuttaraluarutsigit.

Immaqa qanga piusooq mesterlære qaqeqqissinnaagaluarparput, ullutsinnullu tulluussarlugu?

Ilinniakkamik pilersitsisa killormut saatsillugu. Ilinniarnep, ilinniagaqarnermi ukioq siulleq atuarfimiinnani, akerlianilli suliffeqarfimmi nammineq toqqakkami ilinniartitsinerusoq.

Soorunami suliffeqarfiup akisussaaffigissavaa, ilinniartoq ilinniakkamini ilinniartinneqarnissaa, ilinniartullu akisussaaffik tigullugu malinnaalluarluni ilinniarnissaminullu piumassuseqarluni.

Ukioq siulleq qaangiuppat, neriutugalugu inuusuttup suliani ilinniartifigisanilu nuannarilluinnalersimassagai, arriitsunnguamik atuagarsornermut artornannginnerusunut ingerlatinneqassaaq, sulineranut tunngasortaa qimannagu.

Demokraatit isumaqarput, ilinniarnep taamaattoq inuusuttumut kajumissuseqarnerunermik, inuusuttullu amerlanerusut ilinniagaqalernissaannik kinguneqarsinnaasoq.

Taamatut oqaaseqarluta pissuserissaartumik kinguneqartussamillu oqallinnissarput kissaatigaarput.

1

<http://www.stat.gl/publ/da/UD/202001/pdf/Uddannelse%20og%20besk%C3%A6ftigelse%20for%20unge%202018.pdf>